

Prof. dr Nedžad Korajlić



Nedžad Korajlić, rođen je u Tešnju, 18. juna 1963. godine. Osnovnu i srednju školu završio je u Tešnju, Višu školu unutrašnjih poslova 1996. godine u Beogradu, stekavši zvanje pravnika unutrašnjih poslova, a Fakultet bezbjednosti i društvene samozaštite u Skoplju 1990. godine, čime je stekao zvanje diplomiranog kriminaliste. Na Fakultetu kriminalističkih nauka Univerziteta u Sarajevu je 2003. godine odbranio magistarski rad na temu "Kriminalistička obrada kod ubistva" i stekao zvanje magistra kriminalističkih nauka, te je na istom fakultetu doktorirao 2006. godine na temu „Kriminalistička metodika otkrivanja i dokazivanja eksplozija“, stekavši zvanje doktora kriminalističkih nauka. Od 1988. godine radio je u policiji na mnogim dužnostima, od kojih se izdvajaju sljedeće pozicije: inspektor za opšti i privredni kriminalitet, šef Odsjeka za suzbijanje kriminaliteta, šef Odsjeka za narkotike i opasne droge, načelnik Sektora policije, te pomoćnik ministra za poslove policije Zeničko-dobojskog kantona, a dobitnik je i najviših policijskih priznanja - Srebrne i Zlatne policijske značke. Akademsku karijeru započeo je 1997. godine, kao asistent na Fakultetu kriminalističkih nauka Univerziteta u Sarajevu. Nakon izbora u naučna zvanja višeg asistenta, docenta i vanrednog profesora na naučnu oblast „Kriminalistika“, te obavljanja dužnosti direktora Instituta za kriminalistiku, forenzička istraživanja i sudska vještačenja, te šefa Katedre za kriminalistiku, od 2012. godine je dekan Fakulteta za kriminalistiku, kriminologiju i sigurnosne studije Univerziteta u Sarajevu, i to u zvanju redovnog profesora od 2015. godine. Pored nastavničkih aktivnosti na matičnom fakultetu u sva tri ciklusa studija, predavač je i na Pravnom fakultetu Univerziteta u Zenici, na Pravnom fakultetu Univerziteta u Travniku, Visokoj školi „Logos Centar“ u Mostaru, te na Visokoj poslovnoj tehničkoj školi u Doboju. Također, predavao je na Pravnom fakultetu Univerziteta u Sarajevu, na Pravnom fakultetu Univerziteta AAB u Prištini, na Fakultetu civilne odbrane i Kriminalističko-policijskoj akademiji u Beogradu, itd. U 2014. godini održao je edukativnu obuku za visoke policijske zvaničnike emirata Ras Al Khaimah u Ujedinjenim Arapskim Emiratima, te time započeo buduću saradnju koja se ogleda u kontinuiranoj edukaciji policijskih i vojnih struktura širom UAE. Autor je i koautor 20 knjiga, udžbenika, rječnika i monografija, od kojih se u naučnoj i stručnoj javnosti osobito izdvajaju „Istraživanje krivičnih djela“, „Kriminalistički rječnik“, „Krizni menadžment“, „Osnovi kriminalistike“, „Kriminalistička metodika“, itd. Autor je više od 60 naučnih i stručnih radova, objavljenih u BiH i inostranstvu, učesnik brojnih domaćih i međunarodnih naučnih skupova, seminara u Evropi i SAD-u, te rukovodilac više naučnih i stručnih projekata. Član je brojnih naučnih odbora, kao i izdavačkih odbora i redakcija naučnih časopisa, te međunarodnih strukovnih udruženja. Oženjen je i otac dvije kćerke. Živi i radi u Sarajevu i Tešnju.